

Un krench'i Birgen

EDISHON 12 • desèmber 2020



Pa tur e lektornan di un Krenchi di Birgen,

Nos a drenta luna di desèmber di año 2020. I eseis ta nifiká ku poco poco año 2020 ta yamando ayó!

Luna di desèmber ta un dushi luna. Un luna ku nos ta celebrá nasementu di Kristu Hesus i ta preparando pa kambio di año. Aunke nos ta den e normal nobo, tòg nos lo celebrá na un manera adaptá e akontesimentonan aki. Tur esaki pa nos grandinan!

Año 2020 no tabata fásil. Nos a enkontrá diferente reto. E loke a afektá nos organisashon pues nos grandinan mas tabata e COVID-19. Aunke bo prepará bon p'é, tòg e ta yega serka den un forma ku bo no ta plania.

Nos a haña nos ta sera pa bishita un par di biahá i bolbe habri bék na diferente okashon. Tur esaki pa protehá nos grandinan mas mihó posibel. E habrimentu bék tabata bai di un forma organisá teniendo kuenta ku e reglanan nobo en konekshon ku COVID-19.

Nos lo keda hasi nos máksimo esfuerzo pa kuida nos grandinan, apesar di tur kos, pa asina tene e malesa di COVID-19 mas limitá posibel den nos organisashon.

For di aki un petishon na famianan pa komprehension i na nos personal pa sigui kuida i keda salú.

Tur kos bon!

Entrevista ku:
Raylison Bernabela



PÁGINA 2

Jerusalema Dance Challenge



PÁGINA 3

Entrevista ku:
Viola Kwidama



PÁGINA 4

Entrevista ku:
Sildra Stefania-Caciano



PÁGINA 6

Hubileo Pasadia Mi Amparo



PÁGINA 7

**Fundashon Birgen
di Rosario**

Weg naar Welgelegen 64
T. 462-3121
E. birgen@birgendirosario.com
W. ouderenzorg-birgendirosario.com

Raylison Bernabela: E ambiente ta dushi!


For di sèptèmber 2019 Raylison Bernabela (25 aña) ta laborando komo ‘bejaardenverzorger’ na Nos Lantero. Promé ku esaki Raylison a traha na Heavenly Home i L’Aldea, pero na Nos Lantero e ta sinti ku empleadonan ta manera un famia.

Eksperiensia ku hende grandi

Fo’i chikitu Raylison a kustumá ku hende grandi. Tur mainta e tabata lanta 4’or serka su wela na Boneiru. Raylison tabata pasa su wela insulina, yudele baña i drecha pan. Despues e mester a hiba su wela na un Pasadia pa hende grandi i buskele bèk ora skol kaba. Na promé instante Raylison no a kere ku e lo drenta sektor di kuido, pero durante su estudio di “Praktisch Kadergerichte Leerweg” el a skohe pa e sektor aki, dor ku e tabatin eksperiensia ku su wela kaba. Ora el a kuminsá ku su estudio, el a gusta mesora.

COVID-19

Mundialmente nos no tabata prepará pa COVID-19 i e malesa aki a kambia hopi kos. E situashon pa ku COVID-19 tabata un tiki ferfelu pa Raylison. Durante e toke di keda polis tabata parele tin biahá. Raylison a ripará tambe ku e situashon ta difisil pa e grandinan de bes en kuando. Maske ku tabatin ‘video call’, nan tabata sinti falta di nan famia ora nan no por a risibí bishita. òf e grandinan tabata sinti falta di keirumentu pafó di e lokalidat.



Den temporada difísil bo tin ku sostené otro i Nos Lantero a haña sosten di koleganan di Pasadia Mi Amparo. Nan a yuda otro bon i e ambiente tabata dushi. Dor ku e ambiente ta dushi entre koleganan, e habitantenan tambe ta pasando dushi. Nan ta sinti e mesun ambiente. Koleganan ta yuda otro i habitantenan tambe ta duna un kontribushon pa kosnan kana bon.

Futuro

Raylison ta siñando hopi den sektor di kuido. Mas malesa i remedí ta bini aserka i bo mester sa kon ta atendé ku esaki. Por ehèmpel na Nos Lantero Raylison mester a siña kuida hende ku tin demensia. Semper e mester adaptá na kosnan nobo. Den futuro Raylison ke sigui ku e estudio di ‘bejaardenverzorger’ nivel 4.

Raylison ta un mucha hòmber ku ta hopi aktivo. Despues di trabou e ta sigui traha, porta e ta pela un par di hende òf laba un par di outo. E no por sinta ketu i gusta traha riba su plannan pa futuro.

Mensahe final

Pa otro hóbennan Raylison tin e siguiente mensahe: “Skohe un trabou òf estudio ku bo ta bon den dje, skohe algu pasobra bo tin smak den dje. No bin trabou ku kara rabiá òf desgustá. Sòru ku bo tin amor pa bo trabou. Ta konsiente ku bo trabou ta duna abo i bo famia pan. Tur kos ku ta preokupá bo, lagé na kas i duna bo máksimo na trabou.”

Jerusalema

Dance Challenge

E kantika 'Jerusalema' ta un kantika di góspel kaminda e artista Master KG di Suráfrika ta pidi protekshon i guia pa bai Jerusalem, kual e ta konsiderá e kas di personanan religioso. A lansa e kantika na final di 2019 i el a bira popular mundialmente un par di luna pasá ora a kuminsá ku e 'Jerusalema Challenge'. E meta di e 'Jerusalema Challenge' mundialmente ta pa trese positivismo.

Tabatin diferente initiativa den nos fundashon pa organisá e 'Jerusalema Challenge' i a forma un komishon pa por realisá esaki. E komishon tabata eksistí di Urni Victoria, Margela Piaternella, Carmen Haseth, Corriena Alberto i Danilda Piaternelle. Den luna di sèptèmber mas òf ménos 40 kolega a partisipá tur siman den treinen di baile bou di supervishon di koreógrafo Ivan Felipa. Danki na e komishon i e koleganan aki ku por a kreá algu úniko i esaki tabata un oportunitat pa empleadónan di Birgen uni mas!



Viola Kwidama: Hopi lucha, pero m'a surpasá tur!



Viola Kwidama a traha 44 aña na Birgen i el a pasa den un trayektoria largu. Viola a drenta den e funshon di hasi limpresa. Despues di un luna, sùr Modesta a disidí ku e funshon den administrashon ta mas mihó pa Viola. Sùr Modesta no a logra haña un vakatura habrí den administrashon, p'esei Viola mester a bai traha den kuido. Viola a traha dos aña den kuido i el a sigui laborá despues den kushina. Pero e funshon aki tabata pisá pa su kurpa. Entre otro e rèkmentu pa yega na kashinan tabata un molèster pa su kurpa. Un dia Viola a haña hopi doló i e tabata malu na kas pa 1,5 aña.

Perseveransha

Ora el a regresá trabou bèk, Viola a mira un oportunidad nobo ora el a tende ku un resepshonista lo baha ku penshun. El a yama UTS pa inskríbi su mes pa lès di ‘telefonie’, kual el a kaba ku éksito. Su chèf tabata e único persona ku tabata na altura ku Viola a bai lès di ‘telefonie’.

Ku su konosementu i abilidat nobo Viola por a traha como ‘invalster’ den e funshon di resepshonista, banda di su trabou den limpresa. Ora e resepshonista a baha ku penshun, nan a skohe pa Viola traha ‘fulltime’ como reseptionista.

E trayektoria di 44 aña a bai ku hopi reto. Por ehèmpel ora e tabata traha ‘late dienst’ tin biahia Viola mester a keda drumi si e konvoi di Bândabou a bai kaba. Despues di lanta mainta na Birgen, e ta bai kas i bin bèk mèrdia.

E mester a kana un distansha basta largu pafó pa warda e konvoi bini. Tabatin hopi lucha pero Viola a surpasá tur. E no tabatin niun problema ku niun kolega ni cliente.

Memorianan dushi

Un situashon ku semper Viola a keda kòrda tabata un anochi ora el a traha ‘late dienst’ na Habaai. Tabata anochi i diripiente Viola i su koleganan a mira un sombra riba muraya. No tabatin niun otro kolega na un otro departamentu den Habaai. A bin resultá ku tabata sùr Modesta sin kalashi bistí.

Normalmente nan a kustumá di mira e sombra di sùr ku su kalashi bistí. Viola tabatin hopi bon eksperiensia ku sùr Modesta. Sùr por a rabia ku bo pero despues ku su rabia baha e ta kla ku e asuntu. E tabata hopi severo pero e tabata yuda e trahadónan durante trabou tambe.

Na Habaai Viola a traha hopi uní ku su koleganan, nan tabata yuda otro hopi. Nan a forma gruponan di baile, kor i komedia. Pafó di trabou nan tabata trein i ora tin aktividatnan nan tabata presentá nan talentonan pa e habitantenan den teater di Habaai. Nan a hasiele ku hopi amor. Hasta pafó di trabou koleganan tabata sali huntu. Esun ku tin outo tabata buska e otro koleganan.

Pa e koleganan ku Viola a laga atras, e tin un mensahe. “Hopi forsa i hopi pasensi pa nan por pasa riba e añanan ku falta.”

Reset Kokada



Ingredienten

2 koko seku
500 ml di awa
1 kilo di suku
1 telep di vanilla essence (òf di otro smak)
Opshonal: 2 cup di awa
Food color si ta deseá pa duna e kokada un koló spesífiko.

Preparashon

Kibra e kokonan ku b'a saka for di e kaska pa despues kita e kaska maron skur for di e koko. Ora esaki ta kla, raspa e kokonan. Den un wea pone e suku i awa na kandela i agregá e esensia di vanilla. Bira nan bon den otro i laga e suku kushiná kue punta. Na momento ku esaki ta e kasos ta basha e koko raspá den e suku. Sigui dreí i lag'é bira un tiki diki. Ora e kokada kaba di kushiná, bahe esaki for di kandela.

Ku un kuchara ta saka e kokada na e tamaño deseá i poné nan den un kòmchi. Si bo ta deseá pa e kokada sali mas duru i grandi, ta pone 2 kilo di suku en bes di unu. Bo por laga e kokada keda blanku òf ta pone 'foodcolor'. Pa e kokada pretu no ta kaska e kokonan i ta usa suku bruin en bes di suku blanku.

Tep: ora bo saka un tiki suku na kandela ku un kuchara, lag'é lèk den un tiki awa. Si e tarda pa lèk, e ora ei bo sa ku e suku a kue punta.



Sildra Stefania-Caciano: Trata tur hende bon no ta kita nada fo'i bo.

Sildra Stefania-Caciano mihó konosí komo Sil òf Chichichi, awor ta disfrutandó di su penshun bon meresí despues di a laborá kasi 40 año pa Fundashon Birgen di Rosario. Den su karera largu Sildra a pasa den diferente etapa.

Habaai

El a kuminsá traha na Huize Welgelegen komo ‘bejaardenverzorgster’ dia 1 di sèptèmber 1980. Sildra a traha na tur departamentu di Habaai. Ántes e departamentunan tabatin lèter A te ku E. Trahando na Habaai el a disidí riba su mes pa sigui un estudio di ‘Textielvorming’ fuera di ora di trabou, ku a dura 3 año.

Sildra tabata skor puntonan haltu pa tur e tareanan ku nan a haña. Jùfrou a hasta mustra otro hende trabou di Sildra como ehèmpel den klas. Ora sùr Modesta a mira su trabounan, el a bisa Sildra ku e tin di bai traha na Nos Lantero dia ku e ta habri.

Un momento ménos dushi tabata ora un hefe di departamentu a bisa sùr ku Sildra no a trata e herida di un mener su pia i ku nunka Sildra a baña un señora ku tabata mas haltu kuné. E hefe di departamentu no tabata na altura ku Sildra semper ta yega trabou tempran pa e hasi e trabounan aki. E dia aki Sildra a rabia i kue su tas pa bai kas. E hefe a puntra Sildra unda e ta bai i kiko e mester bisa sùr. Sildra a bisé ku e ta bai kas i ku e hefe por bisa sùr lokual e tin gana di bisé! Sildra a traha 5 año na Habaai.

Nos Lantero

Dia 15 di sèptember 1985 Sildra a bai traha na Nos Lantero. Huntu ku un direktor femenino, yu di Kòrsou ku a bini for di Hulanda, nan a drecha tur kos pa asina por a risibí e promé habitantenan.



Na Nos Lantero Sildra a haña e oportunidat di sigui un estudio di guia di aktividat ku a dura 3 año na IFE, kual el a kaba ku éksito. Sildra ta un persona ku semper ta traha duru pa logra un meta. Por ehèmpel un biaha, Sildra i su koleganen a logra di organisá un bon kuné ku a generá Naf 25.000!

Trahando na Nos Lantero, Sildra i otro koleganen tambe por a bai Hulanda. Pa 6 siman largu nan a bishitá kas di hende grandi “Bergen op Zoom”. Den e periodo aki Sildra i su koleganen por a mira kon nan ta duna kuido na hende grandi, i visa versá. E tabata un interkambio entre enfermeranan di Hulanda i Kòrsou. Ora nan a regresá Nos Lantero bék, nan a bini ku ideanan nobo.

Sildra a traha 30 año masha dushi mes ku e habitantenan di Nos Lantero. E habitantenan aki ku masha entusiasmo a keda lantá, warda Sildra yega anochi pa yudele dòrna pa un aktividat ku ta tuma lugá su manisé mainta. Lastimamente den novèmber 2014 Sildra a haña e notisia ku e no a gusta. Esta e kambio di un kas di kuido pa un otro.

Pasadia Mi Amparo

Dia 9 di yanüari 2015 Sildra a kuminsá na Pasadia Mi Amparo ku koleganen diferente ku e no a gusta, pero e mester a traha ku nan. Den promé instante no tabata dushi pa traha na Mi Amparo, pero kos a kuminsá kambia. Despues di un temporada koleganen i un direktora nobo a bini.

Tabatin momentunan hopi dushi trahando ku koleganen i klientenan manera bon koperashon trahando riba diferente aktividat ku a kai mashá na smak. Entre otro obra di man, keirumentu, ‘happy hour’, wak pelikula, ets.

Presente

Awor ku Sildra a baha ku penshun e no ta lanta tempran mas. Mainta e ta wak Mòru Bon Dia pasobra e gusta wak notisia i tende informashon di diferente kos. Ademas e ta traha dos biaha pa siman como voluntario na Birgen. Sildra por wak bèk den pasado i rekordá hopi momentu dushi i ménos dushi tambe.

Tabatin diferente konfrontashon entre kolega, direktor i direktora den pasado. Sildra tabata defendé su mes pero semper el a keda profesional. E forsa di Dios a dunele ánimo i yudansa pa sigui traha den periodonan difísil.

Di eksperiencia Sildra ta kompartí e mensahe aki: "Traha ku bo boka será. Hasi bo trabou, papia di kos di trabou so, no bai papia di kos personal. Laga kada hende ku nan asuntu. Skohe pa trata kolega, stazjère i cliente bon. Trata tur hende bon no ta kita nada fo'i bo."



Hubileo Pasadia Mi Amparo

Riba 1 di òktober Pasadia Mi Amparo tabatin dòbel fiesta, pasobra nan a celebra Dia di Hendi Grandi i nan hubileo di 38 año! Dia 1 di òktober 1982 Pasadia a wòrdú fundá den Habaai i dia 1 di òktober 1987 e pasadia a muda den e edifisio "Mi Amparo" (ántes Theresia school). Huntu ku e grandinan e trahadónan a celebra e dia tan spesial aki.





Historia di Birgen

Riba dia 1 di mart 1943 maneho di Stichting voor Ouden van Dagen “Birgen di Rosario” a hür lanthùis St. Catharina pa fungi komo un kas pa hende muhé for di 60 aña. Dor ku e distansia tabata largu pa mantené kontakto regular ku e direktora, nan a buska un otro lokalidat.

No tabata fásil pa haña un otro lokalidat pero por fin ‘Pensionaat Welgelegen’, ku a keda usá dor di ‘Schutterij’, lo a bira bashi. Danki na e kontribushon di Sùr Luciana, maneho di nos fundashon por a hür un parti di e edifisio.

‘Zusters van Roosendaal’ a keda ku e maneho di ‘Pensionaat Welgelegen’. Asina entrante 15 di desèmber por a yama bonbiní na 7 hende grandi den e edifisio espasosio aki.



Dia Internashonal di Diabétis

A proklamá 14 di novèmber como Dia Mundial di Diabétis i e tema di aña 2020 ta: Enfermeranan i Diabétis. E aña aki nos ta para ketu na e kontribushon importante di enfermeranan pa ku e prevenshon i aporte na personanan ku ta biba ku e malesa diabétis. Cliente ku tin e malesa “diabetes mellitus” por eksperensiá komplikashonnan ku entre otro su nèrvionan, wowonan, nirnan, pianan i ku sirkulashon di sanger.

Problemanan ku sirkulashon di sanger por hasta redusí e sintimentu den e cliente su pia. Ta importante pa rekonosé tempran si e pia ta kore rísiko pa haña komplikashonnan manera herida ku no ta sana lihé, amputashon i deformashon.

Enfermeranan ta hunga un ròl importante pa ku prevenshon di e desaroyo di un pia diabétiko serka un cliente ku tin diabétis. Tepnan preventivo pa ku un pia diabétiko:

- Duna alimentashon saludabel;
- Laga e cliente move mas tantu posibel (preferibel 30 minüt pa dia);
- No laga e cliente kana ku pia abou, ni riba tapeit;
- Kontrolá su pia tur dia i wak tur banda;
- Seka su pia bon, no lubidá e pida entre su dedenan di pia;
- No kòrta su uñanan i kita kayo bo mes, laga un spesialista hasi esaki p'é.

Dia di Hende Grandi / Siman di Kultura







Milenga

Mi lenga,
Den nesesidat salí
Fo'i alma di aventurero,
Kultivá na boka di katibu,
A bai drecha su pará
Den kuentanan di yaya.

Su kurashi sin keber
-E marka brutu di su nacementu -
A but'ele rementá busá
I forsa di su gan'i biba
A lant'é di suela
Den un warwarú di pusta boka.

Su kantika tin kandela
Su simplesa tin koló.
Ku su wega di palabra
Mi por 'nabo bo soya
Ku su ritmo i su stansha
Mi por sinta namorá
Na mi lenga di krioyo
Ku su zjeitu di zonidu
No tin duele ni legria pa herami,
Ni tin sort'i sintimentu
Ku mi n'tribi machiká.

Pierre Lauffer

Hubileo

Supriana V. A. Bejaardenverzorgende 1 di yüni 12 ½ año Nos Lantero	Davelaar J. I. R. Bejaardenverzorgende 1 di desèmber 25 año Dagopvang	De Aquino-Luciana D.F. Huishoudassistent 10 di sèptèmber 35 año Huize Welgelegen
Felicia E. D. P. Bejaardenverzorgende 1 di òktober 12 ½ año Huize Welgelegen	Rombley N. D. Ziekenverzorgende 18 di yüni 30 año Richardushuis	Pablo L. D. F. Ziekenverzorgende 10 di sèptèmber 35 año Huize Welgelegen
Martina Y. J. Kantineassistent 1 di desèmber 12 ½ año Richardushuis	Jansen S.G. Huishoudassistent 1 di yüli 30 año Nos Lantero	Rosa A. C. Huishoudassistent 10 di sèptèmber 35 año Huize Welgelegen
Krips S. M. G. Kantineassistent 1 di desèmber 12 ½ año Richardushuis	Denisia E.L. Bejaardenverzorgende 1 di sèptèmber 30 año Richardushuis	Wawoe - Piaternella Kantineassistent 10 di sèptèmber 35 año Huize Welgelegen
Etmon A. A. Bejaardenverzorgende 1 di desèmber 12 ½ año Huize Welgelegen	Cathalina M.A. Aktiviteitenbegeleider 15 di sèptember 30 año Dagopvang	Kwidama-Ricardo M. S. Kantineassistent 23 di òktober 35 año Huize Welgelegen
Monte A. A. Bejaardenverzorgende 1 di yüli 20 año Huize Welgelegen	Leito-Maria V. G. Kantineassistent 1 desèmber 30 año Huize Welgelegen	Jardinier S. M. Bejaardenverzorgende 1 di yüli 40 año Huize Welgelegen
Sambo-Boelbaai S. F. Huishoudassistent 16 di òktober 20 año Huize Welgelegen	Martina-Hato I. L. Pedicurist 1 di sèptember 35 año Huize Welgelegen	Lourens-Ricardo E. F. Bejaardenverzorgende 1 di yüli 40 año Huize Welgelegen
Manuela-Supriana D. L. Human Resources Manager 1 di desèmber 20 año Centraal Bureau	Alberto C. S. Kantineassistent 10 di sèptember 35 año Nos Lantero	Jardinier-Leonora A. C. Maatschappelijkwerkende 7 di yüli 45 año Huize Welgelegen
Martina E. M. Meerzorgziekenverzorgende 19 di yüni 25 año Huize Welgelegen	Van Ams I. E. Meerzorgziekenverzorgende 10 di sèptèmber 35 año Huize Welgelegen	
Camelia W.T. Hoofd Verzorgingsafdeling 1 di yüli 25 año Nos Lantero	Girigoria R. A. Bejaardenverzorgende 10 di sèptèmber 35 año Huize Welgelegen	

Den kushinanán di Birgen di Rosario

Kada kas ta involví e grandinan ku e preparashon pa kushiná un kuminda dushi i saludabel. E aktividat aki ta stimulá nan sistema motóriko fini.





SUIDAT

1. AMSTERDAM
2. BRASILIA
3. GEORGETOWN
4. KIEV
5. LAGOS
6. LUANDA
7. MOSKOU
8. PARAMARIBO
9. WILLEMSTAD
10. ANTANANARIVO
11. CANBERRA
12. HAVANA
13. KINGSTON
14. LIMA
15. LUXEMBURG
16. ORANJESTAD
17. TEHRAN
18. ZAGREB
19. BOMBAY
20. CARACAS
21. ISTANBUL
22. KRALENDIJK
23. LONDON
24. MADRID
25. OSLO
26. VANCOUVER

K	G	L	F	Z	A	G	R	E	B	M	D	X	I	G	B	K	L
R	A	M	S	T	E	R	D	A	M	A	V	S	R	D	C	L	U
A	L	O	X	Y	Y	U	N	D	T	A	O	H	O	A	M	C	A
L	M	F	R	K	I	O	A	S	N	R	N	B	N	G	M	O	N
E	G	K	C	T	D	N	M	C	A	O	A	B	H	P	A	H	T
N	J	G	G	N	A	E	O	N	T	L	E	E	O	M	O	L	A
D	M	B	O	V	L	U	J	S	U	R	M	S	J	S	L	K	N
I	X	L	A	L	V	E	G	B	R	L	K	O	L	H	L	H	A
J	B	H	I	E	S	N	N	A	V	S	I	C	S	R	R	O	N
K	R	W	R	T	I	A	V	V	P	T	Z	M	R	K	S	O	A
K	A	B	A	K	T	J	B	K	I	E	V	C	A	K	O	H	R
B	S	D	N	S	V	B	D	M	T	V	C	V	T	H	I	U	I
O	I	H	I	L	U	X	E	M	B	U	R	G	H	L	G	G	V
M	L	Q	X	X	N	U	M	C	D	I	R	D	A	M	Q	Q	O
B	I	G	G	F	Q	I	J	E	R	J	A	D	N	A	U	L	F
A	A	O	N	S	O	G	P	N	A	R	H	E	T	Y	P	H	T
Y	N	W	O	T	E	G	R	O	E	G	M	O	R	C	X	H	K
K	S	A	C	A	R	A	C	P	A	R	A	M	A	R	I	B	O

Riba dia 17 di novèmber nos a kanta bolo pa Nos Lantero!

Pa 35 aña largu Nos Lantero ta sirbi hende grandi di tur religion i sektor di nos komunidat. MASHA MASHA PABIEN na tur trahadó i habitante!



Kurso di baha peso “Chèck bo peso”

En kolabraphon ku Sokudi i Ministerio di Salubridat, Medioambiente i Naturalesa, Fundashon Birgen di Rosario a ofresé un kurso di baha peso pa 15 trahadó. E meta tabata pa konsientisá un kambio den sistema di bida i pa stimulá moveshon. Dia 16 di novèmber e grupo aki a kuminsá partisipá na e kurso ku mester a dura 6 siman largu. Tur siman dietista Marianela de Lanoy ta duna informashon tokante alimentashon saludabel i un kambio di estilo di bida. Ademas e partisipantenan a hasi ehersisio bou di guia di treiner Mi-mush Lieuw.

Diferente oradónan tambe tabata presente durante e kurso. “Life coach” Kamlawatie de Haas a kompartí teps kon pa evitá kome ora bo ta tristu, depresivo, strès, ètsetera. Señor Reinald Leito kende ta ko-fundadó di ‘Bo salú ta den bo kurá’, a duna un charla tokante e ingredientenan tóksiko den nos kuminda.


Teniendo kuenta ku e situashon di COVID-19 i e desaroyonan di último dianan, gerensia di Birgen a disidí di posponé e programa aki te **1 di febrüari 2021**.



Un par di kolega a bini ku e idea pa subi Seru di Kristòf.

Dia 8 di novèmber un grupo di 22 hende, kual tabata konsistí di koleganen i nan famia, a subi e seru.







BO KIER KONTRIBUÍ?

Semper nos ta habrí pa mas hende ku ke skibi un artíkulo. Aserká nos pa duna tep, ideanan nobo òf remarke pa mehorá nos korant.

Manda un email pa Evita Sanches na e.sanches@birgendirosario.com.

KOLOFÓN

Un krench'i Birgen ta un produkshon di:
Fundashon Birgen di Rosario
Weg naar Welgelegen 64
T. 462-3121 / 843-3121
E. info@birgendirosario.com
W. ouderenzorg-birgendirosario.com

KORDINASHON I REDAKSHON FINAL
Evita Sanches

IMPRENTA
Drukkerij Repro